



(khas bagi Majalah Qalam - tidak dibenarkan dikutip)

Peringatan: Pertanyaan-pertanyaan yang tidak disertakan tanda tangan dan alamatnya yang terang tidak diraikan. Juga pertanyaan-pertanyaan yang mengenai di sekeliling hal chwal masyarakat kita itulah yang di utamakan daripada soal yang sulit-sulit dan jarang berlaku oleh kerana ruangan ini adalah berguna juga untuk panduan pembaca-pembaca.

### Menggugur atau Menyekat Beranak

Di dalam keluaran yang lalu kita telah berjanji akan memberikan jawapan-jawapan yang mengenai perkara-perkara “bolehkan *family planning* dan *birth control* dikaitkan dengan menggugurkan beranak?” maka di sini marilah kita cuba mengkaji perbezaan di antara keduanya.

Di dalam keluaran yang lalu telah dibentangkan dengan panjang lebar tentang *family planning* dan *birth control* dan sudah juga diterangkan satu persatu jalan-jalan di dalam perkaitannya dengan perkara-perkara yang mengenai hukum-hukum agama. Daripada keterangan-keterangan itu jelas bahawa kedua-dua cara itu dijalankan ialah menahan benih daripada bercampur – dan dikaitkan pula kepada perkara-perkara ber‘izal yang telah berjalan masa Rasulullah (SAW) dengan membawa beberapa riwayat hadis yang mengenai perkara itu.

Tetapi bagaimana jalan dengan menggugurkan anak? Menggugurkan anak di dalam kandungan itu ertiinya menggugur benih yang telah tumbuh. Untuk ini adalah molek bagi alim ulama’ kita sebelum memberi hukum makruh, haram dan seumpamanya, hendaknya menyiasat lebih dahulu akan akibat atau bencana atau pun, jika ada, kebaikan kepada diri seseorang untuk menggugur anak yang telah lekat di dalam rahim ibunya itu.

Bagi kita masa ini adalah termasuk di dalam zamannya sains maka adalah sangat mudah bagi ulama-ulama kita jika sebenar-benarnya mahu menyiasat, untuk mengetahui persesuaian keadaan dengan menentukan hukum-hukum di atasnya.

Di atas tadi telah kita katakan bahawa jauh bedanya di antara menggugurkan anak dengan menyekat beranak. Haruskah atau bolehkah menggugurkan anak, makruhkah atau haramkah, dapat kita berikan jika kita mau mengetahui selok beloknya perkara menggugur anak itu (menggugur benih yang ada di dalam rahim ibunya yang disebut di dalam bahasa Inggerisnya *abortion*).

Tuhan di dalam al-Quran, tatkala menceritakan kejadian kanak-kanak daripada rahim ibunya itu telah berfirman (maksudnya):

“Sesungguhnya Kami telah menjadikan manusia daripada tanah. Kemudian Kami jadikan dia air mani yang disimpan di dalam tempat yang kukuh (rahim). Kemudian mani itu kami jadikan seketul daging; dari daging itu kami jadikan tulang, maka tulang itu kami bungkus dengan daging, kemudian kami jadikan makhluk yang baharu, yakni manusia yang sempurna kejadiannya, Maha Berkah Tuhan sebaik-baik yang menjadikan” – (surah al-Mū’minūn 12 – 14).

Ayat-ayat di atas ini adalah menerangkan cara kejadian manusia – bagaimana mula jadinya sehingga kepada kejadian yang sempurna di dalam rahim ibunya. Bila masanya ia beroh: di dalam sebuah hadis yang diriwayatkan oleh Abū Dāwūd tatkala meriwayatkan bila roh itu ditiup ada berkata (maksudnya):

Sesungguhnya kejadian salah seorang kamu dikumpulkan di dalam perut ibunya 40 hari, kemudian ia menjadi darah beku seperti itu juga (40 hari), kemudian ia menjadi segumpal daging seperti itu juga (40 hari) kemudian Allah mengutus kepadanya seorang malaikat lalu diperintah kepadanya empat perkara: rezekinya dan amalnya dan ajalnya. Kemudian ditulis ia sebagai orang yang celaka atau yang berbahagia, kemudian ditiup roh padanya (Riwayat Abū Dāwūd)

Di dalam hadis ini terang bahawa dalam masa tiga kali empat puluh hari (120 hari) adalah ditiupkan roh bagi kanak-kanak yang ada di dalam kandungan ibunya. apabila kita cantumkan keduanya yang tersebut di atas ini terang bahawa anak itu diterangkan satu persatu kejadiannya. Adakah keterangan-keterangan ini untuk meluluskan menggugur anak atau adakah ia sebagai suatu keterangan tentang kejadian manusia yang diatur oleh Allah mengikut sunnah-Nya.

Jika sekiranya keterangan-keterangan ini dinyatakan sebagai meluluskan menggugur anak. Yakni kenyataan-kenyataan yang mengenai kejadian manusia itu dijadikan alasan untuk merosakkan barang yang telah tumbuh maka harus pendapatan yang serupa ini akan banyak menerima bantahan sama ada daripada segi agama atau pun daripada umum. Ketentuan kejadian itu adalah digunakan juga oleh hukum-hukum pidana (negeri) iaitu anak di dalam kandungan, yang telah bernyawa, jika digugurkan dengan sengaja adalah disifatkan sebagai membunuh diri seseorang. Perbuatan ini adalah hukumnya haram

samaada di dalam hukum pidana atau pun hukum agama.

Tetapi bagaimana hukumnya jika digugurkan sebelum sampai masa itu yakni sesudah ia mengetahui dengan tepat bahawa ia telah hamil. Hal inilah yang dicuba oleh sebahagian pihak untuk menyatakan bahawa yang demikian itu hanya makruh hukumnya. Alasan-alasan yang diberi di dalam perkara ini tidak tepat dan nyata tetapi keterangan-keterangan itu samar-samar sahaja. Alasan-alasan yang diberi selalu berdasarkan kepada pendapat orang lain – bukan pendapat dari ijtihadnya sendiri dengan alasan-alasan yang disendikan kepada kitāb Allah dan sunnah Rasulullah (S.A.W.)

Bagi ulama kita masa sekarang, berhubung dengan terbukanya ilmu sains, sebagaimana kita terangkan di atas, mustahak sungguh lebih dahulu mengkaji keadaan seseorang itu kalau ia menggugurkan kandungannya. Umpamanya kalau kandungan itu baharu sebulan betapa kesannya kepada tubuh, kalau dua bulan dan seterusnya kalau tiga bulan.

Jika semuanya ini kita ketahui mendedahkan kepada bahaya-bahaya yakni boleh merosakkan kesihatannya dan boleh pula mendedahkan kepada bahaya maut jika diketahuinya yang demikian itu maka hukumnya sudah terang haram.

Walhasil, kita tidak mendapat sesuatu keterangan, sama ada pada segi kesihatan apalagi agama yang meluluskan menggugurkan anak terutamanya sesudah berumur tiga bulan; dan jika sekiranya diniatkan pula kerana takut tidak terberi pelajaran atau tidak terberi makan maka sudah terang hukumnya ditegah melakukannya sedang di dalam perkara ini pula untuk mengawal kesihatan ibu itu atau pun tidak ada pula – bahkan kesihatan seseorang ibu itu, sebagaimana lazimnya, apabila suda menggugurkan kandungannya dengan dipaksa sudah tentu akan terganggu yang bermakna mendedahkan diri kepada bahaya.